

## DOMENIE XVIII «VIE PAL AN»

### Antifone di jentrade Sal 69,2.6

Salvimi, Diu,  
spessee a difindimi.  
Tu sês tu il gno ripâr e la mê difese;  
Signôr, no sta intardâti!

### Colete

Vuarde, Signôr, i tiei fameis  
e da la tô eterne protezion a di chei che te domandin;  
a di chei che si tegnin in bon di vêti par lôr creadôr e paron  
rinove lis robis che ti plasin e ten cont di ce che tu âs rinovât.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Is 55,1-3

#### Vignît e mangjait.

Dal libri dal profete Isaie  
Vualtris ch'o vês sêt, vignît chi des aghis;  
ancje chel che nol à bêçs, vignît!  
Comprait e mangjait cence bêçs  
e cence spindi vin e lat!  
Parcè mo spindêso bêçs par chel che nol è pan,  
e si strussiaiso par chel che no us sacie?  
Scoltaitmi ben, mangjait robis buinis  
e o gjoldarês une mangjative sauride.  
Slungjait la orele e vignît chi di me,  
scoltait e la vuestre anime e vivarà!  
E o fararai cun vualtris un pat par simpri,  
il boncûr che nol mole imprometût a David.  
Peraule di Diu.

### SALM RESPONSORIÂL dal Salm 144

**R.** Spalanche la tô man, Signôr, sostente ducj chei ch'a vivin.  
Il Signôr al è pazient e di boncûr,  
pegri tal inrabiâsi e splendit te misericordie.  
Al è bon cun ducj il Signôr,  
il so afiet al rive sun dutis lis sôs voris. **R.**

I vôi di ducj viers di te si voltin e ti spietin,  
e tu tu ur dâs di mangjâ su l'ore juste.  
La tô man tu tu spalanchis  
e tu sostentis fint avonde ducj chei ch'a vivin. **R.**

Il Signôr al è just in dutis lis sôs stradis,  
sant in dutis lis sôs voris.  
Il Signôr ur sta daprûf di ducj chei che lu clamin,  
di ducj chei che lu clamin cun scletece. **R.**

### SECONDE LETURE Rm 8,35.37-39

Nissune creature no rivarà par mai a distacânus dal amôr di Diu in Crist.  
De letare di san Pauli apuestul ai Romans

Fradis, cui rivaraial a distacânus dal amôr che Crist al à par nô? La tribulazion, la pôre, la persecuzion, la fan, la nudità, i pericui, la spade?

Ma in dutis chestis robis nô o stravincin in fuarce di chel che nus à volût ben. Di fat o soi sigûr che ni muart, ni vite, ni agnui, ni potencis dai agnui, ni cumò, ni avignî, ni altecis, ni profunditâts, ni nissun'altre robe creade no rivarà par mai a distacânus dal amôr che Diu al à par nô, in Crist Gjesù nestri Signôr.

Peraule di Diu.

### **CJANT AL VANZELI cf. Mt 11,28**

**R.** Aleluia, aleluia.

Vignît di me, ducj vualtris ch'o sês stracs e masse cjamâts,  
e jo us fasarai polsâ, al dîs il Signôr.

**R.** Aleluia.

### **VANZELI Mt 14,13-21**

**Ducj a mangjarin fin passûts.**

Dal vanzeli seont Matieu

In chê volte, cuant che al vignì a savê de muart di Zuan Batiste, Gjesù al partì di li cu la barcje par ritirâsi tun lûc desert. Lis folis, a pene savût, a tacarin a lâi daûr a pît, sichè, cuant che lui al rivà, al cjatà une vore di int. Alore al sintì compassion par lôr e al vuari i lôr malâts. Sore sere, si faserin indenant i siei dissepui a dîi: «Il puest al è desert e e je za passade l'ore. Torne a mandâ indaûr lis folis, par ch'a ledin tai bords a comprâsi di mangjâ». Ma Gjesù ur rispuindè: «Nol covente che si 'nt ledin; daitjur di mangjâ vualtris». Lôr i rispuinderin: «No vin nuie chi, dome cinc pans e doi pes». E lui ur disè: «Puartaitmai chi». I ordenà a la int di sentâsi su la jerbe. Po al cjapà i cinc pans e i doi pes e, alçâts i vôi viers dal cîl, al disè la preiere di benedizion, al crevâ i pans e ur ai de ai dissepui e lôr a la int. E ducj a mangjarin fin passûts; dai tocs restâts a puartarin vie dodis sportis plenis. Chei ch'a vevin mangjât a jerin sui cincmil oms, cence meti in cont feminis e fruts.

Peraule dal Signôr.

### **Su lis ufiertis**

Santifiche, Signôr te tô bontât, chescj regâi  
e, daspò di vê acetade l'ufierte de vitime spirituâl,  
fasinus diventâ ancje nô une ufierte eterne.  
Par Crist nestri Signôr.

### **Antifone a la comunion Sap 16,20**

Tu nus âs preparât, Signôr, un pan dal cîl,  
un pan in grât di dânus ogni contentece  
e di sodisfâ ogni gust.

### **O ben: Zn 6,35**

Al dîs il Signôr: Jo o soi il pan de vite.  
Chel ch'al ven di me nol varà plui fan  
e chel ch'al crôt in me nol varà plui sêt.

### **Daspò de comunion**

Compagne cu la tô continue protezion, Signôr,  
chei che tu âs ristorât cul regâl dal cîl  
e fâs diventâ degns de redenzion eterne  
chei che no tu ti stufis mai di vuardâju.  
Par Crist nestri Signôr.